

曾文正公奏議卷五

迎勦犯嶺逆匪疏

奏爲逆匪分犯大赤大洪二嶺進撲祁門老營官軍迎勦獲勝追賊出嶺恭摺奏祈

聖鑒事竊祁門西北兩路嶺隘紛歧西路之大赤嶺北路之大洪嶺尤爲扼要臣于去年十月內閱視祁縣東北一帶嶺防派副將唐義訓踏看祁西各嶺形勢在于大赤嶺頭修築柵卡並分防大小櫟根嶺派撥祁門老營更番戍守大洪嶺向有徽防戍兵近日提臣江長貴

駐扎柏溪更于大坦湘源兩處節次設防以固門戶叠
經嚴飭諸將慎密扼守正月初六日午未間連接西北
兩路探報石埭大股賊匪同日分犯二嶺大洪嶺一股
都司曹貴迎擊受傷退至長排經江長貴派隊援應該
逆退伏嶺脚時已昏暮不能測其踪跡大赤嶺一股副
將黃惠清迎擊傷亡弁勇多名且戰且退當夜折回祁
門賊已竄至厯口臣以該逆兩路進犯不利分擊當俟
其來撲時堅守營壘添調外援爲夾擊之計初七日探
知大洪嶺之賊經江長貴督隊擊退防兵仍至嶺頭堵

塞卡隘北路可保無虞而大赤嶺竄入厯口之賊乍前
乍却探報歧異臣以北路旣穩于初八日辰刻派副將
唐義訓統領強中湘前及前左前右春字等營馳赴厯
口一帶迎勦詎我軍行至距祁二十里之石門橋賊已
距橋不遠唐義訓與各營官登高瞭望見白旂之匪約
二千餘人擁至橋外田壠見官軍大至排列未動橋外
山岡黃旂黑旂花旂諸逆分三大股約計四五層遠山
之外遙望旂幟紛紛不見其尾唐義訓與各營官商派
哨隊分爲三路以黃惠清一支伏于橋左山沖以副將

沈寶成都司張遇春一支伏于橋右山後唐義訓督同
通判朱聲隆當中一路排列橋頭及附近山上以候選
知縣易潤壇督領接應各隊分派甫定揮令中路過橋
白旂之賊經由田壠猛撲而前我軍鎗砲齊施該逆後
隊仍復搖旂大進白旂賊拚命抗拒戰約半時之久我
軍伏兵齊起黃惠清由左路沖內突出沈寶成張遇春
由右路山後突出易潤壇後隊繼至左右兩路均翻山
包出賊後砲斃騎賊一名殺悍賊數十名唐義訓朱聲
隆乘勢揮令猛進中路賊勢不支我軍一齊猛撲聲振

羣山該逆且退且拒各軍追殺純從兩旁包抄賊尸縱橫冒林墜石拋棄旂幟鎗械無算窮追三十餘里至武陵嶺外距祁已五十里矣酉刻收隊回北小路口適前派駐防樸根嶺之震字營官馬復震亦來會合初九口早唐義訓率各軍出隊過嶺仍分左右中三支并進敗賊之回聚厯口程村者望見官軍掩至驚潰而走我軍追勦直出赤嶺之外是役計斃賊千餘名生擒一百三十五名陣斬賊首麟天豫古得金獲其偽印奪獲旂幟二千一百餘面鎗砲二百三十餘件驢馬百零五匹我

軍傷亡百餘人經唐義訓稟報前來臣查此股逆匪卽
去年十一月內撲犯羊棧嶺竄踞盧村之賊經我軍大
加懲剝甫厯四十餘日復敢直犯祁門據生擒賊供該
逆謀知臣處官軍盡回勦景鎮一帶祁門老營空虛意
欲攻我不備計殊狡毒此次擒斬渠魁賊之器械拋棄
殆盡足以寒賊黨而快人心副將唐義訓與記名總兵
朱品隆二人由李續賓部下調至臣處樸實耐勞心思
靜細口不言功去年克復建德及此次保全祁門均能
以少勝衆所有出力將士仰懇

天恩併入建德案內開單請獎陣亡各員另摺懇請
賜卹以慰忠魂所有逆匪分犯大赤大洪二嶺進撲祁
門老營官軍迎勦獲勝緣由理合專摺由驛馳奏伏
乞

皇上聖鑒訓示謹 奏

咸豐十一年正月二十四日

嘉慶十一年五月二十日

聖上聖鑒臨示 奏

臣

門生營官軍門候選祖謙山莊合應歸市職職人奏
總辦趙桂恩奏准旨發回伏惟大憲大裁一節並奏
天恩准入學請來山莊中書奏明各員以昭體面

移駐東流建德片

再僞忠王李秀成股匪由廣信內犯意圖竄擾江西腹地臣于正月二十四日附片具奏在案厥後李逆果圍建昌府城晝夜環攻安肅道劉于醵派兵救援正月二十七八九等日屢次開仗尙與城中文報不通無論能否解圍而大股旣入內地則或犯南昌省垣或犯瑞州臨江皆不可不預爲之防必須有大枝勁旅馳往援勦庶江西完善之地不至糜爛又皖北四眼狗大股勾結捻匪四路狂竄聞霍山官軍敗挫准撫臣胡林翼函商

臣處派兵救援北岸亦須有大枝勁旅渡江援勦庶安
慶垂成之功不至中棄臣處兵力祇有此數現在張運
蘭一軍防勦徽州休甯之賊左宗棠一軍防勦新犯婺源
之賊此外別無勁旅可作他處援兵萬不得已臣當
移駐東流建德防堵下游池州蕪湖各股而抽出鮑超
一軍作為游擊之師或馳援江西腹地或馳援皖北各
路視其尤急者而應援之或可少遏凶鋒是否有當理
合附片具奏伏乞

皇上聖鑒訓示謹奏

咸豐十一年二月初八日

曾文正公奏請

卷五

分勦西北兩路逆匪疏

奏爲嶺外逆匪竄撲西路厯口北路禾戌等嶺分頭擊
勦大獲勝仗恭摺奏祈

聖鑒事竊正月初六日逆匪分犯大赤大洪二嶺提臣
江長貴擊退北路大洪嶺之賊副將唐義訓擊退大赤
嶺之賊前經奏明在案臣以西路厯口地當要隘卽于
祁門抽撥三營駐防厯口以副將沈寶成統之二月二
十三日西路樺根嶺外之賊破卡而入竄至箬坑北路
之賊亦破禾戌嶺而入江長貴親督將弁由柏溪馳援

堵禦尙爲得手西路箝坑之賊四出焚掠二十五日圍
撲厯口營盤廩集河洲約近萬人并有騎賊百餘扼踞
石橋橫截我軍歸路後面山林中旂幟密布復有賊入
九千人自卯至午迭次猛撲各營將士堅壁固守不稍
搖動但以鎗砲擊之斃賊多名前者裹尸後者繼進臣
于二十五日派記名總兵竹山協副將朱品隆率洲前
親兵等營由祁門赴援厯口賊聞援兵將至解圍以去
二十六日黎明朱品隆派同知朱聲隆文童楊德霖藍
翎把總朱寶隆率八哨由厯口之右翻山包繞而去朱

品隆自與沈寶成易澗壇楊鴻烈李公選副將陳玉恒
都司張遇春從九楊慶春率十三哨由厯口之左沿河
夾擊而出以副將胡暉堂都司賀湘洲守備喻賢能各
帶哨隊伏後接應朱聲隆等行距汪村二里許正值賊
匪大股前來因整隊不動賊已三次鼓譟始麾各哨猛
擊之砲斃黃衣悍賊數名敗而復進我軍愈戰愈奮賊
且拒且走正掩殺間見汪村突出騎賊百餘經我軍劈
山砲擊中十餘人又見村後山中賊衆前來抵敵適楊
德霖朱寶隆已至山上喊聲大震朱品隆等將塘下陳

田葉村各匪擊敗亦追抵汪村左右兩路合而爲一賊
遂大潰我軍乘勝追至櫟根嶺始行收隊計斃賊九百
餘名生擒僞丞相宋先祥等三十七名解散脅從以千
計奪獲騾馬四十七匹旂幟五百餘面敗賊悉遁嶺外
此二十五日朱品隆赴援厯口二十六日會勦箬坑大
獲勝仗之實在情形也北路犯嶺之賊二十三日竄撲
禾戌嶺卡并分犯湘源楓樹嶺等處江長貴親督游擊
王金鼎江國林守備達金龍等馳往援應已革副將羅
承勲抵禦嶺賊正在危急之際見援兵大至軍心始壯